



PRIMEIRU MINISTRU

DISKURSU

SUA EXELÉNSIA PRIMEIRU-MINISTRU

KAY RALA XANANA GUSMÃO NIAN

IHA OKAZIAUN

**SERIMÓNIA LANSAMENTU PRIMEIRA PEDRA BA
DEZENVOLVIMENTU NO EXPANSAUN AEROPORTU
INTERNACIONÁL PREZIDENTE NICOLAU LOBATO**

Área VIP Aeroportu Internasionál Prezidente Nicolau Lobato, Dili

20 Maiu 2025

Exelénsias

Membrus Governu

Membrus Korpu Diplomátiku

Reprezentantes husi Parseirus dezvoltimentu

Senhoras no Senhores,

Ho laran haksolok boot tebes mak ha'u mai iha-ne'e, hamutuk ho ita-boot sira, iha serimónia ofisiál lansamentu primeira pedra ba Dezenvolvimentu no Expansaun Aeroportu Internasionál Prezidente Nicolau Lobato.

Ohin ita celebra 23.º Aniversáriu Restaurasaun Independénsia. Tinan ruanulu-resin tolu liubá ita hotu kompromete ona atu harí Estadu ho Nasaun ida-né.

Ita mós hatene dezafius ne'ebé ita kontinua hasoru, hanesan kona-ba infraestruturas, nebé hanesan motór ba dezvoltimentu.

Se ita hakarak dezvoltimentu ekonómiku no sosiál ba povu timor tomak, ita tenke harí no kuidadu didi'ak infra-estruturas bázikas lubun boot ida nebé bele apoia saúde, edukasaun, agrikultura, mobilidade ba ema hotu, indústriá, kreximentu setór privadu ho bein-estár jerál populasaun tomak nian.

Dezenvolvimentu infraestruturas vitál tebetebes ba dezenvolvimentu nasional, ba ekonomia nebé dinâmika no produtiva, ba kriaun empregu no ba konsolidasaun instituisoens iha ita-nia territóriu tomak. Né la'ós de'it ligasaun fízika, maibé liuliu — asesu ba servisu, merkadus, oportunidades no ba comunidade rejional no global einjerál.

Exelénsias

Senhoras no Senhores,

Dezenvolvimentu infra-estruturas hanesan prioridade ida husi IX Governu Konstitusionál, tuir objetivu Planu Estratéjiku Dezenvolvimentu 2011-2030.

Bainhira Governu hahú nia mandatu, iha 1 julhu 2023, ami revé hikas projetu sira nebé halo tiha ona planu, inklui projetu ba aeroportu, atu nuné bele garante nia sustentabilidade ho efikásia, no mós nia viabilidade ba nesesidades dezenvolvimentu país né nian.

Ha'u ható'o agradamentu ba ami-nia parseiru sira ba apoiu tomak nebé sira fó ba iniciativa ida-né, hodi permite ami konsebe aeroportu ida nebé bele responde ba nesesidades no kapasidades país nian.

Dezenvolvimentu ho expansaun Aeroportu Internasionál Presidente Nicolau Lobato sei garante korredores ba transporte aéreu modernus hodi liga Díli ba kapitais rejionais no integra Timor-Leste ho forma nebé efikáz liu iha sistemas rejionais no globais.

Aumezmu tempu, né permite ami reforsa pozisaun Timor-Leste nian iha ASEAN no iha rejiaun Ázia-Pasífiku einjerál.

Senhoras no Senhores,

Ita la bele garante dezenvolvimentu inkluzivu no sustentável bainhira la iha sistema infraestruturas nebé sólidu no integradu.

Ha'u reafirma ami-nia kompromisu tomak atu promove modernizasaun iha infraestruturas krítikas país né nian, ho objetivu impulsiona (ka dudu ba oin) kreximentu ekonómiku no hadi'a bein-estár populasau, hodi garante dezenvolvimentu sustentável ami-nia país nian.

No ha'u reafirma kompromisu husi Governu atu garante transparénsia, efisiénsia ho efikásia iha prosedimentus no prosesus jestaun investimentu públiku tomak, hanesan iha setór infra-estruturas.

Halo de'it la to'o; presiza halo didi'ak!

Atu konklui, ha'u hakarak hatu'o ha'u-nia agradesimentu ba instituisaun sira sira nebe servisu hamutuk ona ho ami iha esforsu nasional ida-ne, inklui JICA, BAD ho governus Japão no Austrália, ba sira-nia apoiu ba projetu né.

Obrigadu.

Kay Rala Xanana Gusmão